



Plêzîr dès vacances

Marcel DAVID

(wallon de Harre)

Awè, li meûs d' julèt' nos-amine lès vacances
Dès-èfants èt dès-omes, èt tos leûs-agrémints ;
Lès scoles sèrèt leûs pwètes, po deûs bons meûs sûrmint ;
Lès carpês s' plêront bin, c'è-st-ine acèrtinance.

Èt tot plin d' intrèprises, ossi cloyèt leûs pwètes
Po lèyî rispwezer ine miyète leûs-ovrîs ;
Zèls nin pus n' polèt nin dimorer ènn-èrî,
Èt i n-a qui vont fé tot plin dès kilomètes,

Po z-aler foû payîs, avou tote leû famille,
Sovint wice qui fêt tchôd, wice qui n-a dè solo
Po rouvî sès mås d' tièsse, èt po s' rimète a flot,
Ou bin 'nné profiter èt dmorer bin tranquile.

Totes lès îdèyes sont bones ; n-a k' prèfèrèt l' campagne
Po z-î trover li r'pwès èt 'ne grande pâhulisté.
Lès cis ki n'ont nin sogne di s' fé accidinter,
Vont tchûzi ine ôte vôte, ènn-aler al montagne.

I n-a dès cis qu'in.mèt co mî d'aler al côte,
Po poleûr fé trimpète èt pwis bin s'èspôzer,
Profiter dè solo, d' adram' si fé bronzer,
Èt d' risquer tot d' on còp, di s' fé prinde po ine ôte.

Kwand lès vacances sont oute, k' on rlouke è s' pore manôte,
Èt ki di totes façons i fât ènnè raler,
On sâye tot bin bon'mint di n' si nin afoier
Po totes lès çanses ki sont dmorèyes avâ lès vôte.

Malêjis mots :

acèrtinance = certitude. / **carpê** = enfant. / **ènn-èri** = en arrière. / **oute** = passé. / **pwète** = porte. / **r'pwès** = repos. / **pâhulisté** = tranquillité. / **r(i)louki** = regarder. / **sogne** = peur. / **d'adram'** = comme il faut.